

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 42 (1956)

Nachruf: Msgr. protonotari apostolic e decan dil capetel catedral : Sur Gion Benedetg Venzin
Autor: D.G.

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.04.2026


ETH-Bibliothek Zürich, E-Periodica, <https://www.e-periodica.ch>

Msgr. protonotari apóstolic e decan dil capetelatedral**† Sur Gion Benedetg Venzin**

A caschun della mort e sepultura de nies aultreveri Msgr. Gion Benedetg Venzin, eis ei compariu in grond diember de necrologs ed undrientschas¹ de siu operar sco plevon, domdecan e vicari general, ch'ei fuss grev de scriver enzatgei buc enconuschent ord la veta de quei grond e zun meriteivel spiritual. Havend percuriu quella reha litteratura necrologica, havein nus era entupau il necrolog, screts el »Pelegrin«, da Sur Giusep Durschei, plevon de Tujetsch, ed apprezzond quel per in dils megliers ch'ei ensumma vegnius screts, laschein nus suandar el cheu tale quale, aschunschond sulettamein ina cuorta notizia pli u meins personala.² Il bi necrolog de Sur Giusep secloma:

¹ En memoria de Msgr. Benedetg Venzin, da G. P. (= Sur G. Pelican), Gasetta Romontscha, nr. 67, 1955 dils 23 d'uost; 2. Msgr. Benedetg Venzin, Decan dil capetelatedral de Cuera, Gasetta Romontscha, nr. 66, 1955 dils 19 d'uost; 3. Msgr. Domdekan Benedikt Venzin, Protonotarius Apostolicus zum Abschied (da -i-) Bündner Tagblatt, nr. 190, 1955 dils 18 d'uost; 4. Die Bestattungsfeierlichkeiten für Msgr. Domdekan B. Venzin, Domdekan (da Montanus) BT, nr. 195 dils 24 d'uost 1955; 6. El medem nr. sco 5 ei compariu in artechel: »Der Pfarrer und Domdekan in Chur (da G. R. M.); 7. Abschied von Domdekan Venzin, Neue Zürcher Nachrichten, nr. 192, 1955 dils 29 d'uost ed auters biars necrologs ell'ulteriura pressa grischuna e svizzera.

² Nb. dil redactur digl Ischi, e dil Glogn de pli baul: Ha Sur G. Benedetg Venzin era buca giu bia temps e peda de scriver e publicar pli bia lavurs romontschas (in artechel el Cal. Rom. davart »Il pictur Felici Diog de Tschamutt«, in auter el Glogn, »davart la pura romontscha« ed auters pli cuorts), sche persecitava el tuttina tut quei che compareva per romontsch cun viv interess, fagend siper ins e l'auters sias finas criticas e beintuccas remarclas, denton adina cun gronda beinvuglientscha. Aschia sa il redactur digl Ischi dir, che dapi che Sur Venzin ei staus a Cuera, el ha adina persecitau siu operar litterar cun in immens, beinvulent interess, encuraschond, fagend plascher, ed admonend de po tener la dira, essend sin la dretga



via. El fageva quei aschi cordial e bunamein exact tuttina sco pli baul l' auter nunemblideivel Tuatschin, e buca meins savens ch'il tierz bien amitg, aunc oz en arma a Mustér. »Era il pauper scribent romontsch ha mintgaton basegns d'in zucher u d'in zuic« manegiava cun tutta raschun P. B. Berther p. m. — Tgei bialas uras, propi animadas digl ideal havein nus astgau passentar, buca mo ella cella dil P. Tuatschin a Mustér, mobein era quels onns a Cuera en casa pervenda giu sper la baselgia nova dil Salvader e si Cuort ella ven. casa dil decanat catedral. Per tut quei grond sustegn ideal en nies modest brahar litterar, engraziein nus al car defunct da tut cor, cun l'empermischun de nunemblideivla memoria. R. I. P.

»Cun Msgr. decan G. Benedetg Venzin, che ei morts a Cuera la sera dils 15 d'uost 1955, per la fiasta dell'Assumpziun de Maria, ei il pli grond Tuatschin de nies temps ius en fossa. Aunc avon paucs onns havess negin sminau, che quei um ferm e robust stoppi prender comiau da nus aschi spert. Mo las vias dil Segner ein zuppadas per scadin mortal.

Msgr. decan Benedetg Venzin, ni semplamein Sur Benedetg, sco el vegneva aunc adina numnaus bein bugen, — ina enzenna de sia gronda popularitad — ei naschius da miez unviern, ils 13 de schaner 1892 a Sutcrestas / Selva en la vischinonza della caplutta de Nossadunna digl agid, per la quala el ha adina giu ina speciala affecziun. Oriunds d'ina semplia famiglia muntagnarda, profundamein religiosa cun in tschuppel affons (siu bab Vigeli Venzin fuva maridaus duas ga ed aveva giu dus affons en l'emprema lètg ed 8 en la secunda, dils quals treis ein morts fetg baul) ei Sur Benedetg carschius si a Selva. Cun quei ch'el era in buob corporalmein e spirtalmein fetg sviluppau han ins lubiu ad el de frequentar la scola dus onns pli baul ch'igl ordinari e gia en la 3. classa primara ha igl excellent scolar fatg sias empremas translaziuns tudestgas. Da lezzas uras existeva la scola reala aunc buc en Tujetsch e per quei ha el priu uras specialas de tudestg tier il scolast Anselm Capeder a Sedrun. Ses geniturs levon far vegnir el scolast, mo el sez ei sedecidius d'emprender latin. Sur can. Engler, anteriur plevon de Tujetsch, siu cusseglader e menader, ha entruidau el a Sarnen en il collegi dils benedictins de Muri-Gries. In di d'atun ha il giuven student, cun aunc in tschuppel auters che mavan egl jester, fatg il fagot ed ei serendus a pei sur cuolms. Arrivaus a Sarnen ha el giu tschaveras d'anflar il collegi ed igl empren meins ei staus per el ualti stufis. Ils auters students miravan empau uiersch sin quei buriu Tuatschin en sia mondura starschlida de carpun. El sez piteva grevamein de sentiments d'inferiuradad e fuva sil prezint de far la cofra. Mo suenter strusch in meins fa il professor de latin l'emprema scripziun ed il Sur Benedetg ei il sulet della classa, che fa quella senza sbagls. Quei ha dau curascha al cumpogn ed era aviert ils egls a ses conscolars. Dapi lu eis el s'avanzaus ad in s'avanzar e dapi la 3. classa latina ha el adina purtau a casa

las meglieras notas. Cunzun en lungatgs fuv'el in distinguiu scolar. Dasperas fuva el in student spir veta, leghers e da buna veglia, mo era conscienzius e serius ils dretgs muments. Il gimnasi ha el concludiu cun ina excellenta matura igl onn 1914 ed ei lu sedecidius de serender el seminari de s. Leci a Cuera per studegiar teologia. Era leu fuva el adina in dils megliers.

Igl onn 1917 fa el sia messa nuviala a Sedrun. Igl ei stau ina fiasta solemna e pompusa cun massa pievel, pertgei dapi biars onns fuva ei buca stau pli messa nuviala en la Cadi. Il Msgr. uestg Georgius tarmetta Sur Benedetg en la biala pleiv de Breil, nua ch'el pastorescha cun premura e capientscha e buca senza ina certa rigurusadad 14 onns ora. Siu special amitg e confrar Sur Balzer Pelican p. m., da lezzas uras plevon a Dardin, raquintava bia de lur bravuras e travaglias e de lur studis e discuors comunabels. Domisdus ein stai dus umens fetg spirtus e luvrus, schegie zun differentes de character. Fertion che Sur B. Venzin era in um practic e clar en sias disposiziuns fuva Sur Balzer ualti complicaus e spir retenientschas. In ligiom de fideivla amicezia ha ligiau quels dus tochen la mort. Domisdus ein stai spirituals exemplarics de bien cor, che han luvrau e pituu per la muntanera confidada. Sur Benedetg saveva magari esser ualti impulsivs sco il giuven Rein, aschia ch'ei pareva forsa beinduras, ch'el hagi in pugn dir. Mo tgi ch'enconuscheva el pli da tier, saveva ch'el manegiava bein e leva il bien de tuts. A Breil ha el rimnau sias empremas experientschas, buc adina senza oposiziun, battiu da forza pil bien spert de sempladad e renovau ils altars della baselgia parochiala e dellas capluttas. Leu ha el era scret differentas caussas: p. ex. quellas oreifras »Brevs ad in giuven«, che ein comparidas regularmein ils emprems onns en la VdM. Insumma ha el adina giu ina speciala affecziun per la giuventetgna muntagnarda ed animau bia ga en la pressa e sin scantschala de matener la vera carezia per nossa buna tradiiziun religiosa e culturala. El fuva in predicatur de vaglia, che capeva d'inflammar ils cors dils auditurs. In tshuppel onns eis el era staus commember suprastont della Ligia Romontscha ed ha defendiu cun vigur nos interess sursilvans. Dal temps ch'el pastorava a Breil havess el giu caschun de serender a Roma sco

caplon della guardia svizzera, mo il Msgr. uestg Georgius ha giavischau ch'el stetti a sia disposiziun.

Igl onn 1932 cloma Msgr. uestg quei capavel spiritual a Cuera sco plevon e custos dellaatedrala. Sia buna mumma Rosa n. Simonet de Medel, vieua dapi 30 onns, che fuva adina stada cun el, ei morta a Cuera quei mument ch'el leva s'installar en sia nova pastoraziun. Quei ei stau ina greva frida. A Cuera ha el luvrau da tutta forza principalmein per la scola e famiglia e pils luvrers. Dasperas ha el rimnau bia daners per la baselgia nova dil Salyader, ch'ei vegnida baghegiada sut sia direcziun e nua ch'el ha aunc pastorau ca 4 onns, tochen 1941, il mument ch'il niev Msgr. uestg Dr. Cristianus Caminada ha elegiu el per vicari general. Pli tard ha il papa concediu ad el schizun la dignitad d'in protonotari apostolic ed ins plidava buca senza raschun, ch'el vegni in di uestg de Cuera. Las habilitads e qualitads leutier havessen buca muncau.

Igl onn sogn 1950, quei onn che nus havein celebrau in dubel giubileum: ils 1500 onns uestgiu de Cuera ed ils 50 onns sacerdozi dil Msgr. uestg Christianus Caminada, ha Msgr. decan B. Venzin aunc pudiu organisar e direger quella fiasta pompusa. Mo gliez medem onn ha la nauscha malsogna attaccau quei um en sias meglieras forzas e dapi lu ha il liung e dolorus marteri de 5 onns priu sia entschatta. Igl εμπrem eis el sedustaus cun tuts mieds ed ins saveva nuota capir, ch'ei detti buc in megliurament. Mo la sort ei stada decidida. Onn per onn van sias forzas a digren ed el, schiraus quasi dil tut, lavura aunc amiez sias grondas peinas sco in gigant che vul buca ceder. Senza lavur saveva el buca star. Aschia ein sias forzas seconsumadas ed el ei ius sia greva via della crusch cun exemplarica pazienza tochen alla fin, che Niessegner ha finalmein liberau siu fideivel survient la sera della fiasta dell'Assumpziun de Maria, cura che la s. messa della sera en laatedrala mava ual alla fin.

Bia, fetg bia ha quei bien sacerdot prestau en ses onns de sanadad, mo aunc pli bia ha el prestau ils grevs onns de malsogna. Ed ins astga bein dir, che ual la particulara fidonza ch'el veva da giuven ensi tier Nossadunna ha gidau el aschi bein sur ils nauschs scarpetschs della veta terrestre. Nossadunna ha dau

a sia veta ina noda aparti. Naschius sper la caplutta de Nossadunna digl agid, ha el pastorau gl'emprem a Breil en la baselgia dedicada all'Assumpziun de Maria e lu a Cuera en la catedrala dedicada a Maria assumpta ed ei morts per la fiasta dell'Assumpziun de Maria, assistius da Monsignor uestg Christianus Caminada sez. En siu commuentont priedi funeral remarca Msgr. uestg, ch'il car defunct hagi pronunziau sco davos suspir sin pugn de mort: »Mirei, ella vegn!« Maria sontgissima ei vegnida sezza per quel, che ha ludau e benediu tontas ga cun fervur e carezia la mumma celestia sin scantschala. Ussa ruaussan sias restonzas terrestras sper la catedrala, la gronda baselgia de Nossadunna a Cuera.

Nus, che restein contristai anavos, havein d'engraziar bia ad el, cunzun il pievelet de Selva, de siu vitg natal. Dal temps che quei vitget ei vegnius intschendraus eis ei stau negin che ha priu pli viva art e part dils donnegiai che Sur Benedetg Venzin. Per la baselgia nova de Selva ha el rimnau persuls la gronda summa de 33 000 frs. Il Segner vegli remunerar el oz per tut il bien, consolar ses fargliuns, parents ed amitgs, cunzun sia buna sora Rosa Margreta, che ha giu ton quitau pil car Sur frar. Nus lein mantener il defunct prelat en pietusa memoria. R. I. P. G. D.